

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839





FAAVAEINA 1839

O LE SULU SAMOA

ME 2026

email: sulusamoa@cccs.org.ws -Main Office: Ph. 24414, Ext 29 - website: www.cccs.org.ws

**Rev. Elder
Palemia Tauiliili**
Ta'ita'ifono filifilia 'o le Fono Tele
2026/2027



**Rev. Elder.
Enefatu Lesā**
Sui Ta'ita'ifono filifilia 'o le Fono Tele 2026



NEXT:
Ta'ita'ifono 'o le
Fono Tele
2027/2028

LAULAU FONOTELE EFKS 2026-2027

**Rev Dr.
Taipisia Leilua**
Failautusi filifilia 'o le Fono Tele
2026/2027



**Rev Assoc Prof.
Visesio Saga FS**
Teutupe filifilia 'o le Fono Tele
2026/2027



O LE FAASINO UPU

1. O LE LAUGA	2
2. OSIGA FEAGAIGA IA ME	3
EFKS SIUFAGA	
EFKS VAVAU	
EFKS CANNONS CREEK	
3. LAUGA TAITAFONO FONOTELE	4
4. PEPA FONOTELE 2026	6
5. AU PENISIONE 2026	8
6. SAUNIGA LOTU AU PENISIONE	12
7. AU FAAU'U FAIFEAU SAMOA	12
8. O I'A MAILE UPEGA	13
9. O E UA MALILIU: Iakina Alefaio FSP	15

O LE LAUGA

Tusi Faitau: 1 Nofoaiga Tupu 12:1-8

Matua f.1 “O i latou ia na o mai ia Tavita i Sekeleka ina o nofonofu ai o ia ona o Saulo le atalii o Kiso; o toa i latou e ua fesoasoani i le taua”

Manatu Autu: Na malosi Tavita ona o toa sa fesoasoani ia te ia. (*David was strong because of the heroes that helped him*)

Faatomuaga

O le tula'i mai o Tavita i le pule, na valoia mai le amataga e ala i folafolaga a le Atua. E ui i lea, o le malaga mai le lafanua lata ane i Peteleema, e aga'i atu i le maota i Ierusalem sa umi ma faigata. A o faagasolo le ala, na tosina mai ai e Tavita se vaega faatupula'ia o le 'au lagolago faamaoni o ē na fesoasoani ia te ia e maua le nofoāli'i. O nei fitafita po o siamupini, e faamanatuina mo a latou manumalo i taua ina ua uma ona faapaleina Tavita e avea ma tupu o Isaraelu.

A e o le autu o lenei vaega na afua mai amataga faatauvaa. Ina ua sola ese Tavita mai ia Saulo, na amata ona faapotopoto faatasi tagata fouvale mai le nuu o Isaraelu ia Tavita. E foliga o se tulaga faalē iloga, o lea na latou 'au ai ma Tavita, o lē sa i ai fo'i ni faafitauli ma le tupu, sa latou mulimuli ia Tavita, i le osofaia o fili o Isaraelu (1 Samu. 23:5; 27:8–12). Sa faapaleina o ia e avea ma tupu o Iuta ma sa mulimuli atu ana tagata ia te ia i Heperona (2 Samu.

2:3). Mai iina na latou fesoasoani ai ia te ia e tau mo le fitu tausaga ma le aiga o Saulo (3:1).

Mulimuli ane, ina ua uma ona faapaleina Tavita e avea ma tupu o Isaraelu uma, sa faailogaina e ana tagata i latou lava, e ala i le fesoasoani ia te ia e pu'eina Iepusa, po o Ierusalem, lea na avea ma ona laumua (5:6–10). Sa avea tamalii malolosi ma totonugalemu o se autau malosi. Pe tusa ma le 25 maila i saute sisifo o Kata, na avea ai Sekeleka ma meatotino a Tavita. Sa vaivai lava Tavita ona o sauaga a Saulo. Na afua ai ona sola i Kata i Filisitia. Ua alu o ia ia Akisa le tupu o Kata, e auuuna ia te ia. Ua tuu atu e le tupu le aai o Sekeleka e nonofo ai. I le avea ai o Tavita ma se uo a Akisa, sa mana'omia ai Tavita ona avatu se saofaga ma fa'aalia lona faamaoni ma le gaua'i.

O le mea lea, na ia faia osofa'iga mai Sekeleka e faasaga i ituaiga eseese o le toafa, faoa faamalosi a latou meatotino ma toe aumaia nisi o le vete i Filisitia. O vaega na totoe na ia tufatufaina atu i ona lava tagatanuu e aunoa ma le iloa e Filisitia. O le taimi lea, sa faatasi atu Tavita i Sekeleka ma le toatele o isi “tagata solitulafono” ma tagata sulufa'i mai Iuta seia oo ina ia maua se aofaiga tele o tagata malolosi iina. Sa aofia ai i ana fitafita ni tagata Peniamina e lē mautonu, o nisi o uso a ituaiga o Saulo. Ua fa'aalia ai le tele o le lē faamalieina i le pulega a Saulo. O le igoa Peniamina, o lona uiga “Atalii o le Lima Taumatau” (Faamasino 20:16).

Faatatau

Le Ekalesia e, i lau faitau ma lau faafofoga, o le feau faa le talalelei lea mo i tatou i lenei masina. Fai mai le manatu autu, “Na malosi Tavita ona o toa sa fesoasoani ia te ia”. Ioe, e malosi le taitai pe a lototetele lana 'au tau, e toa le o loo tulai, pe a lelei le tuualalo, tuualalo i mea lelei, ae le o mea le lelei, o le toa moni, e loto fesoasoani. O le tele o lima, e māmā ai se avega, o le muagagana ua tatou masani ai i le galuega a le Alii, o le tele o sulu e maua ai figota.

E leai se tagata e tu faamauga; e mafaia galuega lelei uma, pe a loto gatasitasi se taupulega. E mafai foi ona toe faaupu le manatu autu, “E malosi le Faifeau e taitai, ona e totoa ma lototetele lana Ekalesia e tuualalo ma galulue i mea e lelei ai le galuega.”

2. O LE SULU SAMOA ME 2026

Ioe, le Ekalesia, o le feau faamanatu lea mo i tatou, e lei tupu fua le malosi o Tavita i na ona po, e lei tau toatasi e le atalii o Iese le taua ma ona fili, leai, sa 'au faatasi ma tagata e totoa loto, tagata e malolosi ma finau. E ui ina lama le fili aemaise le faamata'u o Saulo e faisoti ia Tavita, a e na tulai lava e tau ma faamoemoe i le Atua. Auā sa 'au le Atua ma ona tagata, sa aufaatasi le Atua ma Tavita i mea uma na alu i ai, na mafua ai lona manumalo. E faapena foi se feau mo i tatou le au faatuatua. Tatou te le toe tau ma ni tagata malolosi i ni pelu ma ni talita, a o le taua faa le agaga auā le Atua ma lona malo.

Fai mai Paulo ia Efeso, *“Ia outou loto tetele i le Alii, ma le malosi o lona mana. Ia oofu outou i ofutau atoatoa mai le Atua, ina ia outou mafaia ona tetele atu i togafiti a le tiapolo. Auā tatou te le tau ma tagata, a o alii sili, ma faipule, ma alii o le pouliuli o lenei lalolagi, atoa ma agaga leaga i mea o i lagi. O le mea lea ia outou tago ai i ofutau atoatoa mai le Atua, ina ia outou mafaia ona tutu ma tetele atu pe a oo i le aso vale. O lenei ina tutumau ia outou o fusia o outou sulugatiti i le **faamaoni**, ia oofu foi outou i le ufifatafata o le **amiotonu**; ma ia faaseevaeina outou vae i le sauniga o le tala lelei o le **filemu**; ia faaopopo i na mea uma ona tago atu i le talipupuni o le **faatuatua**, tou te mafaia ai ona tinei o u fanafana mu uma lava a le o loo leaga. Ia outou ave foi le puloutau o le faaolataga, ma le pelu a le Agaga, o le **afioga lea a le Atua**.”* (Efeso 6:10-17). O auupega na tatou te tau ai mo Keriso ma lona malo.

Amene.

Saunia Reupena Seteuati Nofoaiga FS

EFKS Elise Fou

Matagaluega FALEATA.

O NISI OSIGA FEAGAIGA

EFKS SIUFAGA, AANA.

O le uluai aso o le masina, Aso Faraile 1 Me na osi ai le feagaiga a le EFKS Siufaga Falelatai, ma lo latou faifeau ia Peni Manila FS ma le faletua ia Florence Mino Manila. O le Toeaina o le Pulega Falelatai ma Samatau, susuga Caesar Samuelu FT na ta'ita'i, o susuga Semikueva Su'a FS (Matautu Falelatai) na faitauina le Tusi Paia, a o Julius Fruean FS (Samatau) na saunia le Lauga. Na molimauna lenei

sauniga mamalu e susuga Toeaina ma Faafeagaiga ma faletua, o le Matagaluega Aana, le Matagaluega Faleata, ma isi itu o le ekalesia. O aiganalua, uo ma paaga a le faifeau ma le faletua, aemaise ai le afioaga o Siufaga. Sa auai foi le mamalu faalemalo, i le afioga i le Sui Faipule o Faleata 1, afioga ia Faumuina Opapo Soanai, le sa avea foi ma faafeagaiga o lenei aulotu i Siufaga, i tua atu o le susuga Andrew Laufiso talu ai. O le susuga Peni Manila ma le faletua na i'u mai Malua i le 2021; o le faifeau o se lupe faalele a aiga ma ekalesia i Faga, Faala, Vaitele fou, a o le faletua o se taulaga soifua a le afioaga i Tafagamanu; na faauuina e avea ma Faifeau Samoa i le Fono Tele 2025.

EFKS VAVAU, L. L. ALEIPATA

E lua faamoemoe tetele o le EFKS Vavau na faataunuuna faatasi i le Aso Toonai 9 Me 2026. O le osiga feagaiga a le Aulotu ma lo latou faifeau, susuga Metusela Viliamu Samoa FS ma le faletua ia Avei, na ta'ita'ia e le Toeaina o le Pulega Lepa ma Lotofaga, susuga Faasalafa Alaovae FT, ma lona auvaa o faafeagaiga o le Pulega susuga Dr. Tavita Maliko FS (Lepa), Uaealesi Israelu FS (Saleapaga) ma Kapeni Matatia FS (Lotofaga). O le susuga Metusela na i'u mai Malua i le 2021, ma faauuina e fai ma Faifeau Samoa i le Fono Tele 2026. O se alo faasino i le susuga Viliamu Samoa FT & Vaita'i sa galulue i EFKS Fogapoa. O lona afioaga e mai Foua Salelologa, a o le faletua ia Avei Paepaetele Europa e mai Fogapoa. Na sosoo le sauniga o le osiga feagaiga ma le faapaiaina o le maota tele fou o le galuega. Malo le galulue mo le Atua ma lana galuega.

EFKS CANNONS CREEK, L O A.

O le aso 29 Me na osia ai le feagaiga a le EFKS Cannons Creek, Matagaluega Laumua o Aotearoa, ma le susuga Esera Junior Esera FS ma le faletua ia Pauline. Na ta'ita'i e le susuga Periti Fauolo FT o le Toeaina o le Pulega Ueligitone i Matu. O Esera Jr o se alo faasino i le susuga Faifeau Penisione ia Auatama Esera FS & Tamara, le sa avea ma Taitaifono Fono Tele 2024. Sa galue o se faiaoga i le Kolisi Faafaifeau i Malua. O lenei sauniga mamalu sa faataunuuna i le malumalu o le EFKS Porirua, ma e pei ona masani ai, sa faatumulia i le paia o le EFKS, o aiganalua, o uo ma aumeamamae. Ua sui tulaga i la'ua ia Aufaga Faafia FT (ua maliu) ma Sina.

LAUGA TAITAIFONO, TATALAINA ALOAIA

O LE FONO TELE 2026

Tusi Faitau: Kenese 32:3-21

Matua: Kenese 32: 11 & 12.

Manatu Autu: Iakopo ma Esau

(Manatu Aoao Vaiaso: Popolega)

O Iakopo ma Esau o le fanau masaga a Isaako ma Repeka. O Esau le ulumatua, a o Iakopo le uii. A ua tatou iloa o Esau e taifulufulua lona tino, o le tuli manu i le vao, o le tagata malosī, e faamoemoe i lona malosī, e fiafia o ia i mea e vaai i ai ma laasaga e faafesagai ma lona ola o aso fai soo. A ua tatou iloa o le taotoga o nuu i sasa'e i ona po o le Feagaiga Tuai, ua uma ona i ai lona faasinoga i fanau i lo latou fananau mai. O le a? O le ulumatua e i ai lona tofi faasino, o le faailoga o le Atua osi feagaiga osiosi ma ona tagata. E afua ai ona i ai faamanuiaga e pei ona taoto i le ulumatua. A e le mafai ona alu ese ai se tagata ua faasino ia te ia ina ua iloa o mea e taua e tatau ona taofiofi mamau o le ola. Ina ia 'aue nei i ai se taimi e mamulu ma faamamuluina ese ai. A ua tatou iloa le tala i le mea na tupu ia Esau. Ina ua ia faatau le tofi o le ulumatua i le 'ai e tasi. E leai lava se taimi e tasi se'i toe mafaufau loloto ifo ai, i faasinoga o ala a le Atua i ana tofiga, e iloa ai le taua o ia mea i soo se tasi, e mafai ona ia maua pe afai o le ulumatua. E popole i mea o le tino ina ia mua'i faamuamua ma ave le faamamafa i mea e pupuu lona aogā ma taimi e aoga ai ona manaoga. Nai lo le taua o faamanuiaga o mea faaleagaga e tuutuu loloa mo le tagata e faapena foi ona oo i le faavavau.

A ua faigofie ona mamulu atu ia mea, ona o lona ola faatalalē ma faatamala i mea paia, ua uma ona ta'ui aulape o le faasinoga o faamanuiaga a le Atua e leai se tasi na te mafai ona aveese ia mea ua folafola mo ia. O lea e fai mai ai le Tusi i le Au Eperu, "*O le mea lea ina faamalolosi ai ia i lima ua gagase ma tulivae ua vaivai..ne'i ai se faitaaga, po o se faatalalē i mea paia, pei o Esau, o le na avatu lona tofi o le ulumatua e faatau a'i le 'ai e tasi. Aua ua outou iloa e mulimuli ane, ina ua mana' o ia ia maua le faamanuia, ua teena o ia.*" O ala o le faatalale ma le faatamala i faamanuiaga faavavau a le Atua. Ua uma ona tuumatamaga lana pule.

E a le Ekalesia Faapotopotoga Kerisiano Samoa? O le ulumatua i tofiga, i le saofaiga a Ekalesia i Samoa, auā ua iloga lona ulua'i taeao i Mataniu Feagai ma le

Ata. O le ulumatua. O lou tofi faaulumatua na pule mai ai e le Atua. O mea faaleagaga o lou tofi lena 'aue nei' i aveesea pe faatama i ai le vaai. Vaai lou tofi faaulumatua, ne'i faoa. Pe a oo ina tatou lē manatu mamafa i le faamoemoe o le Atua mo le Ekalesia Faapotopotoga Kerisiano i Samoa.

Ua lē o toe i ai le EFKS i faigalotu o le 2AP ma le Televisia a le Malo. Aisea? A o le faamanatu lea. E le o se vaega o lo tatou tofi faaulumatua ua tatou faamamulu ese atu? Afai na o fonu tatou te o ai, a ua tia'i lo tatou tofi faaositaulaga ma le si'ufofoga faaperofeta o le Atua, o le feau alofa mo le atunuu ma ona tagata, e afua mai ona o lou tofi. E lē o se vaega o lo tatou fai mea tuulafoa'i ina ua tatou tineia le iila o mea na faia e o tatou matua, o tua'ā ua fai i lagi le folauga. Auā o le tala lea, o outou matua na mua i malae, o i latou na i ai i le saofaiga o le faapotopotoina o le au faatuatua i Samoa. Talofa e, ai lava o tagi mai le manava o le eleele nai o latou loimata ina ua ese le mea ua tatou faia i o tatou auga tupulaga. Auā e faigofie lava ona tatou faia faamatalaga e pupuni ai lo tatou lē faia o lo tatou tofi. A o le lu'i lea, o le lu'itau mo tatou uma. O le feau momoli o le siufofoga faaperofeta o le Atua mo le atunuu ma ona tagata e pele i o tatou matua. E faapea foi ona pele ia i tatou i o tatou auga tupulaga. Sa tatou a'oa'oga uma lava i Malua. O faiga o mataupu i lotu (Cults). O loo manino foi ituaso ma taimi e faailoa ai i le aufaigaluega o le Feagaiga Tuai ma le Feagaiga Fou i le Tusi Paia, ua lava lea e fai ma a'oa'oga mo tagata faatuatua. Ua lava lea. A o isi lotu o i totonu o le saofaiga lea a Lotu Soofaatasi, latou te fa'aaoga le Tusi Paia ma fa'aaoga isi foi tusi e fai ai a latou lotu. O alofa molipo mo le Ekalesia EFKS, ia uu mau lou tofi faaulumatua. A o nisi ia vaega o laasaga o le popolega na fesagai ma le ulumatua ina ua ia le manatu e uu mau lona tofi a ua faatalale i ai.

Fai mai o Iakopo le tagata agamalū, e nofo o ia i le fale'ie. A o gasologa lea o le amataga o le fatufatu o le ola faatuatua o le nuu o le Atua, e amata i le fale'ie. Le fale'ie e nofo ai. Auā o le tala i le faateleina ma le faateteleina o le gagana o le fale'ie, ina ua oo ina fa'aali le Atua i lona nuu ma faasaoloto i latou mai le mea na nofo pologa ai, na amata ai ona fau le fale fetafa'i. Le Atua e malaga faatasi ma le nuu, o lo latou tofi lea e fa'aali atu i le lalolagi. Le Atua e fesaga'i

ma tagata soifua ma tagata ola. Seia oo ina fau le malumalu i Ierusalem. O le ata lava lea e tasi. O le Atolaau o le faailoga o le Atua paia ma le mamalu. Afai o le ala lea na faasino ia Iakopo, o le ala o le taua o le feumiaiga a le Atua ma le tagata i le saofaiga faafesagai. O lona tāua foi lea e lē mafai ona aveese e se tasi e oo mai i o tatou taimi ma auga tupulaga. O le taimi na sola ese ai o ia, na alu ma ave le tofi o le ulumatua. Na alu ma ave faamanuiaga a lona tamā. Ae na ia vaai i foliga o lona uso ua ita, ua le fiafia ua mana'o e fasioti ia te ia. Lea ua alu. A o mea na fetaii ma ia i le ala o lana malaga, seia oo ina toe foi mai o ia, o loo taoto iina faamoemoega lelei o le Atua mo ona tagata i le ala o le faatuatua.

O le po muamua na alu ai o ia na vaai ai o ia i le apefa'i e oo lona i'u i le lagi ma agelu a le Atua e a'ea'e ma ifoifo ma le Atua ua ia iloa. Se a le uiga o ia mea? O le Atua e tumau pea lona silisili ese i luga atoa ma lalo nei. O le ala a oo ina Ia faamanuia, e manuia lava, ma e leai se tagata na te mafai ona toe aveese. O le tala i lona alofa ma lona agalelei ina ua taunuu i le mea o i ai Lapana le tuagane o lona tina, ua talia lelei o ia. A o le tala a le Tusi Paia, na faamanuia le Atua ia Lapana ona o Iakopo. Aisea? O le tagata na alu ua ia te ia manuia. Auā o le taimi ina ua toe foi o ia, ina ua fa'aali mai le Atua e toe foi, na i ai nisi mea mananaia lava o lona olaga, e fai ma faamatalaga o vaega e tupu i le ola o le au faatuatua e moomia ona faia. A ua tuliloa mai e Lapana i lona ita. Peitai na i'u ina lelei, e mafua ai Mesepa i lo la va, e te le toe sopo mai e fai se leaga ia te au, e faapea foi a'u, ou te le toe sopo atu e fai se leaga ia te oe. A ua sau o ia ma faamanuiaga, o faamanuiaga e le gata o lafu manu, a o le faamanuia, o osiosiga feagaiga ma le Atua. O le a? O ana fanau. Auā o ia ua tau ai le finagalo o le Atua ua faamalieina, ia toatele lau fanau e pei o oneone o le matafaga, ma fetu o le lagi. Lea ua sau o ia ma le fanau. A ua oo ina sauni o ia e feiloai ma le uso, ua na ave le savali i lona uso e faailoa i ai, ua foi mai Iakopo o lou uso. Ua oo mai e na auina ma ta'u mai ia te ia, ua sau lou uso ma tagata e fa selau. A ua toe mana'o le tama i ana faiga tuai. O le a? O le fai togafiti. A lea na tatou faitau nei i ai. O le ala o lona popolega, lea ua mana'o ai se'i toe susu'e tasi lava le laupepa o le fai togafiti. Ina ia aogā auā ua na iloa le ita o lona uso. Peitai, faafetai i le Atua i ana auala na saunia. O le a? O le toe foi o ia i le auvai o le Iakopa ma tatalo ai i le po, seia oo ina aoina lana tatalo. A ua fai mai le tagata, e tuu atu ia seia alu ua ao. Ae fai mai lana upu, Ou te lē tuua

oe. Ou te le tuua oe seiloga e te faamanuia mai ia te a'u. O le tali o le popolega o le tagata ua toe mana'o e toe susu'e lona lautusi tuai. Fa'aogā. A lea ua uma ona faamanuia i ai le Atua, e leai se mea o le a toe popole ai.

O isi ia faigata o le lotu i ona po nei. O tatou aso ua faigofie ona faatafiti i tatou. Tatou te manana'o e toe fetagofi i a tatou tusi tuai, e fa'aoga i taimi o mea paia a le Atua. Ua oo i le taimi e moomia ai, e saausi e nofo ma le mautinoa, o le tatalo, o lau auupega lena e toilalo ai fili uma lava.

Le Ekalesia paia e, a le Atua, ua tatou oo mai i lenei tausaga faalefono. A o i ai pea mea taua e ao ona tatou asiasi i ai. E le mafai ona tuua. O le tatalo o le auupega lena ua fa'aali mai e le Alii. Ua uma ona tuu le faavae o le Ekalesia, na tautiga ai o tatou matua ma tua'a ua mavae. E leai se isi na te faasesē. E oo loa ina tuu le faavae a e fai mea tatou te loto i ai, pisa loa, misa loa lea. Aisea? Aua o le faavae na te ave i tatou i le malū; tatou te tilotilo ma vaavaai ai, o mea ua uma ona faataoto lelei. Tatou te o ese loa ma le faavae, pisa loa. Ua i ai mea faapena ua tutupu. A o le feau lena. O ituaso tatou te iloa ai meaalofa a le Atua ua ia te i tatou ua manaomia ona faatino, o lena.

Le Mafutaga a Tina, malo. E leai se mea e ta'u o se ekalesia a tina. Fai malu outou faiva. Faafetai o lea ua amata ona tilotilo i ata o le feliuiga o le aumaiga o le loto faaEFKS i totonu o le saofaiga. Faafetai Manukau. Faafetai Amerika. E le selu atu, a o le uiga lea o le a'oa'oga a le Atua mo i tatou. Tatou tautatā i le moa o le ala i le mea o taoto ai le Faavae o le Ekalesia. Na te aumai mo i tatou le manuia. O le faamoemoe o le Ekalesia Faapotopotoga Kerisiano Samoa talu le amataga e oo mai i le asō, o le mamalu o loo taoto le faamoemoe i lana fono usu ma lana Fono Tele, o ana komiti ua taoto i ai le faamoemoe o le Ekalesia i le ala e faataunuu ai ana Iugafono. O le gasologa taua o feau, toe faamanatu ia te oe ma a'u, le uiga o lo tatou valaauina. Tatou te masalosalo ma oso le popole, pe a oo ina fai e le tagata le mea e tusa ma lona lava manatu. Faamanuia le Atua i le Fono Tele o lenei tausaga. Ona o Iesu. Amene.

Saunia Susuga Enefatu Lesa FT

Taitaifono EFKS 2026

EFKS Tanoalei'a

MATAGALUEGA VAIMAUGA

O LE SULU SAMOA ME 2026 - 5

PEPA O LE FONO TELE 2026

“O LE AGAGA PAIA MA LE EKALLESIA MASALOSALO”

“The Holy Spirit and the doubting Church”

Matua: Ioane 20: 27e, “’*aua foi e te masalo vale, a ia e faatuatua.*” (*stop doubting and believe.*”

Manatu Autu o le Pepa: **‘O le ola masalosalo, e afua ai ona avea ma soo talitonu faamaoni.’**

1. Faatomuaga:

E talitonu le Ekalesia Kerisiano i Europa i Sasa’e (*Eastern Orthodox Church*), o se aga lelei le masalosalo o Toma, auā o lana tuufesilisili ma le naunautai ina ia vaai ma papai i molimau tino ua toetu Iesu Keriso, na afua ai ona mausali lona faatuatua. I lea mafaufauga ua atagia ai o le ola masalosalo, o se vaega o le soifuaga o le tagata. I le vaogagana o le Pepa, ua vavala mai ai ni itu taua o le masalosalo. O le masalosalo e tupu mai ai le lototele e asaina luitau, ma totoina le finau i le tagata e saili atili ai, ina ia maua’a ma mausali lona talitonuga, ma totego ae ai le faatuatua i se faamoemoe taua o tulimatai.

2. Nai vaega taua o le Talalelei a Ioane:

O le Talalelei a Ioane na tusia i le taufaaiuga o le uluai seneturi i le aai o Efeso. O le faamoemoe, ina ia toe lalaga le soifua talitonu o le uluai Ekalesia ia Iesu Keriso. O le Tusi o loo tumatila ai le faaagaina e Ioane o faailoga e fitu (*7 signs*), e faasinotonuina Kerisiano o lea vaitau ia Iesu Keriso, o la lava o le Alo o le Atua.

O le fa’aaogaina e Ioane o faailoga nei e fitu: (1) *Le liliuina o le suavai e fai ma uaina* (2:1-11); (2) *Faamaloloina o le atalii o le tagata mau tofi* (4:46-54); (3) *Faamaloloina o le pipili i Petesa* (5:1-18); (4) *Fafagaina o le motu o tagata e toatele* (6:1-15); (5) *Savali Iesu i luga o le vai* (6:16-21); (6) *Faamaloloina o le tagata na fanau mai lava o tauaso*(9:1-41); (7) *O le faatuina o Lasalo mai le oti* (11:1-57), ina ia tapena ai le faatuatua o le uluai ekalesia o Iesu Keriso, o la lava o le Atua ua liutino. O le tusiga e manatu nisi, o le finauga tusitusia a Ioane (*polemic writing*) agai i isi foi talitonuga ma le poto salalau i na ona po

(*gnosticism*) and (*docetism*). O talitonuga ia sa luitauina le soifua faatuatua o Kerisiano ia Iesu Keriso ma le faaolataga.

O nei talitonuga sa avea ma faapaia fofoga a latou aoaoga. O nisi o a latou finauga: E lē maua le faaolataga i se faatuatua tauaso, pei o le sauniga paia o le Faamanatuga, peitai e tupu le faatuatua ina ua vaai ma iloa, ma lagonaina le paia o le Atua. O le liutino tagata foi o Iesu, ua na o se aitu e leai sona tino faapei o tagata soifua.

A o ituaiga talitonuga ia na avaga gofie i ai loto o Kerisiano, ma ua tuufesilisili nisi pe moni o Iesu o le Atua ua liutino. Lea na alia’e ai le talitonuga seiloga lava e i ai ni molimau tino ona faatoa faatuatua lea ma talitonu. Le ala fa’aaogaina lea e Ioane o faailoga nei e fitu e faamanino ai lana feau, ina ia uluulu matafolau i loto o Kerisiano, o Iesu Keriso lea na afio mai ma militino faatasi ma i latou, o la lava o le Alo o le Atua, o le taunuuga ma le atoatoa lena o le faaolataga mo tagata uma lava, ina ua faatuatua.

E i ai le taofiga, e tulaga ese le tusiga a Ioane mai ia Mataio, Mareko ma Luka. Auā o loo faatatau i le itu-tagata o le Atua e ala ia Iesu Keriso Lona Alo. I le Mataupu e 20:31 o loo taoto ai le ute ma le faamoemoe o Ioane: “*A ua tusia ia mea, ina ia talitonu ai outou, o Iesu o le Keriso lava ia, o le Alo o le Atua...*” O le faamanatu mo Kerisiano uma, ina ia faatumauina ma fa’auauina le talitonu e tetee atu ai i talaiga taufaasesē ia ua aliae mai i lea vaitau.

3. Le molimau a Ioane ia Toma (24 – 27)

Ua faigofie ona tatou ta’ua Toma o le soo lē talitonu o Iesu, auā o loo taua i se vaega o le fuaiupu e 25, “*Afai ou te lē vaai atu i ona lima, i mea na tutu’i ai fao, ma tuu lou tamatamai lima i mea na tutu’i ai fao, ma tuu lou lima i lona itu, ou te lē talitonu lava.*”

I le toe tepa la i tua atu o le faitauga lena (Ioane 20:24-27), ua iloa ai le eseesega o le faatuatua faasoo ma le faatuatua faa-tina. Sa faigofie ona mautinoa e Maria o Iesu lea ua toetu, ina ua faalogo i lona siufofoga: “*Maria e,*” Ona faliu lea o ia ma fai atu ia te ia, “*Raponi e!*” o lona uiga, “*Le a’oa’o e,*” Le faatuatua faa-tina o Maria ua iloa ai o ia lava o le

6. O LE SULU SAMOA ME 2026

soo talitonu faamaoni. Na mulimuli ma le lototele mai lava i Kalilaia, seia oo lava i le tafu'e o le satauro o Iesu Keriso.

Lea lava e mautinoa i le tala a Ioane, na lagona lelei e Maria le siufofoga o Iesu, tali loa "Rapi e!" Ua le gata i lea a ua faataalise e tau i le ausoo masalosalo le Talalelei. O lana lea molimau ua atagia ai lona tulaga faasoo, le tina alofa ma talitonu, le auuuna faatuatua ma le mautinoa ua toetu Iesu lona Faaola. E ui ina le taliaina i le tu faalutaia tina ma tamaitai ona fai ma molimau, faapei ona molimauina e Maria lea taeao manino i le toetu o Iesu Keriso.

3.1 O Toma lē talitonu:

O Toma sa valaauina e fai ma soo a o avea ma se kamuta mai le aai o Kalilaia. Sa iloga i lona silafia i le fofoaina o papa maa e fau ai fale. E mai se aiga maualalo le tamaoiga ma o lona lea siosiomaga na soifua ae ai. Sa faalagolago i ona iloa ma metotia faakamuta e maua ai tupe e tausai ai lona aiga. O le uiga o lona igoa o setasi o le 'masaga' (*twin*). O le igoa o loo atagia ai se uiga faaMataupu silisili; O loo faailoa mai ai le fesootaiga o lona lē talitonu a e mulimuli ane ua mausalī le faatuatua (*character arc from skepticism to profound faith*).

I fuaiupu e 24-25, o loo taua ai sa le'i i ai Toma ina ua uluai faailoa Iesu i ona soo i Kalilaia. E lē o taua foi e Ioane pe aisea na lē i ai Toma i le ituaso na faaali ane ai Iesu i ona soo. O le lē i ai la o Toma i totonu o le fale faatasi ma isi soo, o le ata lafoia o le soo o loo saili pea, o loo tuufesilisili pea pe moni ua toetu Iesu.

A ua atili ai ona lē talitonu Toma ina ua fai i ai le ausoo ua toetu Iesu, auā e manatu Toma, o le a faapefefe ona ia taliaina le tala ua faailoa ane e le au soo, a o lea ua tapunipuni le fale ma nonofo ai i totonu ma le fefefe i taitai o le lotu Iutaia? O le faailoga o le matatau ina nei satia le ola faasoo, aemaise o le tala lea ua salalau ua toetu Iesu mai le oti.

A e mo Toma, e le mafai ona sufia lona talitonu i ni tala faalogo, auā o le tasi lea natura o Toma. O le soo e naunautai e fesilisili, e le faigofie foi ona sufia sona manatu ina ia talitonu gofie (*the skeptical disciple of Jesus*).

3.2 Toma, le soo ua talitonu:

I fuaiupu 26-27, o le tali atu o Toma ina ua fai ane le ausoo ua latou iloa le Alii: *Afai ou te le vaai atu i ona lima, i mea na tutui ai fao, ma tuu lou tamatamailima i mea na tutui ai fao, ma tuu lou lima i lona itu, ou te lē talitonu lava.* O le tali ua manino ai le lotu vilivilitai o Toma ina ia vaai ona mata ma papai atu ona lima ia Iesu. A o le ituiga masalosalo lea na taatele i lea vaitau o le uluai Ekalesia. Seiloga e vaai mata i faailoga e pei ona saafi i ai Toma, ona faatoa talitonu lea.

I le vaega lea o le molimau a Ioane, ua tatou iloa ai, na gata le masalosalo ma le tuufesilisili faasoo o Toma ina ua faalogo i le faatonuga a Iesu: *"Aumai ia lou tamatamailima iinei, vaai mai foi i o'u lima; au mai ia foi lou lima, ma tuu mai i lo'u itu..."* O i tonu na iloa ai, o le mana ma le pule aoao a Iesu e ala i lana faatonuga, na suia ai le lotu lē talitonu o Toma ma avea ai loa ma soo talitonu faamaoni. Auā o le laolao na matala ai noanoataga lē talitonu o Toma, ina ua vaai ma papai i molimau tino o Iesu. O le papai atu la o Toma ia Iesu, o le avanoa faaauuro ua saoloto ma talitonu ai, auā sa leiloa ona o le masalosalo i lona lotu.

4. Molimau ola o le talitonu faasoo o Toma.

E le'i teena e Toma o Iesu ua toetu, auā ua na o tala faalogo na ta'u ane e le ausoo. Ae ina ua vaai ma papai i faailoga na afua ai lona tuufesilisili, tali loa ma faapea ane, *"Lo'u Alii e, ma lo'u Atua e!"* O le tali a le soo ua atoa lona faatuatua, o Iesu Keriso, o le Alo lava ia o le Atua. A o le fagatuaga foi i lona ituaso a Iesu ma Toma, ua iloa ai le alofa faaauau o le Alii i ona soo ma ona tagata uma lava. O le uluai taimi foi lea ua faaogaina ai le faalagiga fou mo Iesu e pei ona taua e Toma: *Lo'u Alii e, ma lo'u Atua e.* O lea ua ta'ua manino e Toma o Iesu Keriso, o la lava o le Atua ua liutino, le faailoga mautinoa o le faatuatua ua tele naua o Toma.

Lea lava ua toe afio ane Iesu e aumai Toma i le mafutaga faasoo ma la e faavavau, auā na afio mai e fai le togiola ma tagata uma lava, faapei o Toma sa leiloa i le masalosalo. Auā o le faatuatua o Toma i lona ituaso ina ua vaai tino ia Iesu, na totogo ae ai le naunautai e talai le Talalelei o le Faaolataga.

Le fatu na totoina e Iesu i le loto o Toma, ua ola lausiusi ma tupu mafalā i totonu o Initia. Fai mai le tala, ina ua tupu le sosaiete o tagata Iutaia i Initia, ona faaosofia lea o le lagona ia Toma ina ia talai le Talalelei i lea atunuu. Sa ia lauga ma fausia Ekalesia Kerisiano e fitu i le itu i Saute o Initia. Sa ia liliuina aiga malolosi ma le taualoa o le tapuaiga Hindu e avea ma Kerisiano.

O nisi o faifeau iloga i le lotu Kerisiano i Initia i taimi o Toma, sa filifili mai i faatumutumuga o aiga iloga nei o le Talitonuga Hindu. Sa ia galue i Initia mo le taimi umi o le 30 tausaga. Peitai, na tagatavaleina Toma ma tanumia ai ona o le Talalelei ia Iesu Keriso. E oo mai lava i lenei vaitau, o loo olaola pea galuega a Toma, auā o le Agaga Paia na faatonufoiau.

5. Upu Faaiu

Le paia o le Fono Tele o lenei tausaga, o lo tatou valaauina e fai ma soo talitonu o Iesu Keriso, e faafelavei pea luitau. Peitai, o se savaliga faalefaatuatua e ao ina to’ a pea i le faasinoga ma le taialaina e le Agaga Paia o le Atua. Ua fetuleni mai suiga ogaoga i lenei lalolagi. O aga toilalo ia a le fili ua afua ai loto masalosalo i tagata i le alofa tunoa o le Atua na fa’aalia e ala ia Iesu Keriso.

A o le faamanatu, ia tatou talitonu ma le faatuatua i uiga loloto o faailoga na faia e Iesu Keriso, e faailoa mai ai o Ia lava o le Alo o le Atua. O Lona Agaga Paia na te faamatalaloto ma faamalamalama ia i tatou le uiga moni o Lona liutino tagata. Auā o lona liutino tagata, na Ia faia ai faailoga tetele e faailoa mai ai le mamalu ma le pule aoao a le Atua.

A e silisili lava ina ua avanoa le satauro, tuufua le tuugamau, ma afio a’e i le lagi Iesu toetu, o faailoga maunitino na e tinei ai le masalosalo e totogo a’e ai le faatuatua maunitino, o Iesu Keriso o le Alo o le Atua faavavau.

Ia galue pea le Agaga Paia o le Atua i le Fono Tele o lenei tausaga.
Soifua.

Saunia Susuga Dr. Reupena Maulolo FS,
Malua Theological College,
Pepa Fono Tele, Me 2026.

TALA’AGA AU PENISIONE 2026

1. Suafa: **NOVE VAILAAU FT**
Aso Fanau: 1 Aokuso 1955
Suafa o le Faletua: **Penina Vailaau**
Nuu o le Faifeau: Vaiala
Nuu o le Faletua: Poutasi, Vaiee, Lufilufi
Aso Faaipoipo: 19 Me 1979

Soifua Galue i le Ekalesia:

- 1982 - 1985: A’oa’oina Kolisi Faafaifeau Malua
1986 - 1988: A’oa’oina Kolisi Faafaifeau Fiti
1988 - 1989: Vaai Faamaumauga a le Ekalesia
1989 - 1992: Sui Failautusi i le Failautusi Aoao
1990: Faiaoga Faavaaitaimi Kolisi F. Malua
1992 - 1997: Failautusi Aoao Ekalesia
1998 - 2026: Tausinuu EFKS Porirua Niu Sila

Tofi i le Ekalesia:

- 1990-1993: Sui o le Matagaluega i le Komiti Faamisionare.
1993-1998: Sui Taitaifono (Deputy Moderator) i le FGFL (CWM).
1992-1997: Faifeau Aulotu Teine Papauta, a o Failautusi Aoao i le Ekalesia.
Sui o Ekalesia Pasefika i le Komiti Tutotonu a le Faalapotopotoga o Ekalesia i le Lalolagi (WCC).

Faifeau o le EFKS Porirua, Pulega Ueligitone i Matu, Matagaluega Laumua o Aotearoa.

2025-2026: Faifeau Toeaina Pulega Ueligitone Matu. Galue mo le resitaraina o meatotino a Aulotu i Niu Sila i lalo o le EFKS.

- Aulotu: **EFKS Porirua**
Pulega: **Ueligitone i Matu**
Matagaluega: **LAUMUA O AOTEAROA.**

2. Suafa: **KERETA FUAFIVA FT**
Aso Fanau: 13 Tesema 1955
Suafa o le Faletua: **Faafetai Fuafiva**
Aso Faaipoipo: 27 Ianuari 1979
Nuu o le Toeaina: Saoluafata, Faatoia, Vailoa Faleata.
Nuu o le Faletua: Lefagaoalii, Samauga Aai o Niue, Magiagi.

Soifua Galue i le Ekalesia:

1987 - 1990: A'otauina Kolisi Faafaifeau Malua
23/2/1991: Osi Feagaiga ma EFKS Vaie'e, Safata.
Failautusi Pulega Siumu & Safata.
Failautusi Matagaluega Falealili Safata Siumu.
Sui o le Matagaluega i le Komiti A'oa'oga Kerisiano.
Sui o le Matagaluega i le Komiti Au Leoleo.
Sui o le Matagaluega i le Komiti Tupe.
2006: Toeaina Pulega Siumu & Safata.

Faletua ia Faafetai Fuafiva:

2010-2011: Peresetene TPT

2024-2025: Taitaifono Mafutaga Aoao Tina EFKS.

Tofi i le Ekalesia:

Faifeau Tausinuu EFKS Vaie'e.

Faifeau Toeaina Pulega Safata & Siumu.

Aulotu: **EFKS Vaie'e**

Pulega: **Siumu & Safata**

Matagaluega: **FALEALILI SAFATA SIUMU**

3. Suafa: SIMALU KOVATI TUILAEPA FT

Aso Fanau: 2 Fepuari 1959

Suafa o le Faletua: **Nefunefu Kovati** (ua maliu)

Aso Faaipoipo: 1989

Nuu o le Toeaina: Magiagi, Sapapalii

Nuu o le Faletua: Saanapu, Falelatai

Soifua Galue i le Ekalesia:

1986 - 1989: A'otauina Kolisi Faafaifeau Malua

1990 - 2026: Faifeau Tausinuu EFKS Taga, Savaii.

1996 - 2019: Failautusi Matagaluega Faasaleleaga.

2025 - 2026: Faifeau Toeaina Pulega Salega.

Tofi i le Ekalesia:

Toeaina Pulega Salega, Matagaluega Faasaleleaga.

Aulotu: **EFKS Taga**

Pulega: **Salega**

Matagaluega: **FAASALELEAGA**

4. Suafa: FAAFETAISULUTUMU MILO FS

Aso Fanau: 22 Setema 1955

Suafa Faletua: **Naila Faasasalu Milo**

Aso Faaipoipo: 13 Iulai 1980

Nuu o le Faifeau: Solosolo, Vailoa Aleipata,
Leone, Amerika Samoa.

Nuu o le Faletua: Vailoa Palauli, Leulumoega,
Tanoalei'a, Faatoia.

Soifua Galue i le Ekalesia:

1999 - 2003: A'otauina Kolisi Faafaifeau Malua

2002 - 2004: Tausitusi Malua Printing.

2004 - 2026: Tausinuu EFKS New Plymouth

2008 - 2010: Komiti o Tupe

2013 - 2026: Teutupe Pulega Ueligitone i Matu

2018, 2020, 2024: Usufono Fono Tele.

Aulotu: **EFKS New Plymouth**

Pulega: **Ueligitone i Matu.**

Matagaluega: **LAUMUA O AOTEAROA.**

5. Suafa: ISAMAELI LIAINA FS

Aso fanau: 11 Aokuso 1955

Suafa o le Faletua: **Kuinivia Liaina**

Aso famau: 16 Novema 1961

Aso Faaipoipo: 4 Iuni 1988

Nuu o le Faifeau: Saoluafata, Lotofaga,
Lalomanu, Safaatoa, Sasina

Nuu o le Faletua: Leauvaa, Fasitootai,
Faletagaloa, Salailua.

Soifua Galue i le Ekalesia:

8 Tesema 1990: Osifeagaiga ma EFKS Logan City.

16 Oketopa 1995: Tatala le Feagaiga.

20 Setema 2002: Osifeagaiga ma EFKS Logan East

Tofi i le Ekalesia:

1985 - 1986: Ofisa A'oa'oga Kerisiano,
Matagaluega Apia Sasa'e & Faia'oga Kolisi
Maluafou.

1991 - 1994: Komiti Feau Eeseese, Komiti Atina'e,
Komiti Faamisionare.

Failautusi Pulega Logan mo se vaitaimi.

Aulotu: **EFKS Logan East**

Pulega: **Logan**

Matagaluega: **KUINISELANI I SAUTE.**

6. Suafa: SABU SUISAMI SAMOA FS

Aso Fanau: 21 Ianuari 1956

Suafa Faletua: Su'eileata S. Samoa

Nuu o le Faifeau: Nuusuatia Safata, Savaia.

Nuu o le Faletua: Tuanai, Saanapu, Puleia, Iva.

Aso Faaipoipo: 16 Me 1979

Soifua Galue i le Ekalesia:

1997 - 2000: A'otauina Kolisi Faafaifeau Malua
2001 - 2006: Ofisa Matagaluega Malua i le
Matagaluega A'oa'oga Kerisiano.
2006 - 2026: Faifeau Tausinuu EFKS Ola Fou,
Deception Bay, Brisbane Ausetalia.

Tofi i le Ekalesia:

2009: Komiti Tupe Faifeau,
2012: Teutupe Fesoasoani
2016: Komiti Atina'e Faifeau
2019: Teutupe Fesoasoani
2024: Komiti A'oga Faifeau

Aulotu: **EFKS Ola Fou, Deception Bay**
Pulega: **Purisipeni Saute**
Matagaluega: **KUINISELANI I SAUTE.**

7. Suafa: **ASORA FARESA FS**
Aso Fanau: 17 Fepuari 1956
Faletua: **Nuuausala Faresa**
Nuu o le Faifeau: Fusi Safotulafai
Nuu o e Faletua: Falevao
Aso Faaipoipo: 14 Iuni 1989

Soifua Galue i le Ekalesia:

1996: Tiakono EFKS Ipswich, Brisbane Aus.
2001 - 2005: A'oa'oga Fesoasoani
2006 - 2009: Kolisi Faafaifeau Malua

Tofi i le Ekalesia

Faifeau Samoa 2013

Aulotu: **EFKS Metropolitan West**
Pulega: **Purisipeni Sisifo**
Matagaluega: **KUINISELANI.**

8. Suafa: **FUATA'I MISIAITA FS**
Aso Fanau: 17 Aperila 1956
Faletua: **Siloma Misiaita**
Nuu o le Faifeau: Faleasi'u, Tula Am. Samoa,
Vailoa Amerika Samoa.
Nuu o le Faletua: Sapapalii, Lalomanu, Satalo,
Vailoa Palauli.
Aso Faaipoipo: 13 Ianuari 1995.

Soifua Galue i le Ekalesia:

2003-2006: A'otauina Kolisi Faafaifeau Malua
2007-2011: Faifeau EFKAS Magele i Niu Sila
2012-2026: Faifeau EFKS Favona i Niu Sila

Tofi i le Ekalesia:

2014-2016: Sui Matagaluega i le Sosaiete Au
Taumafai
2022-2026: Failautusi Matagaluega Aukilani

Aulotu: **EFKS Favona**
Pulega: **Waitemata**
Matagaluega: **AUKILANI**

9. Suafa: **TAFESILAFAI FAAFETAI LAVASII FS**
Aso Fanau: 8 Me 1956
Faletua: **Miriama Lilo Ola Fuiavailili**
Nuu o le Faifeau: Musumus, Vaigaga, Aai Niue
Nuu o le Faletua: Luatuanuu, Vaiusu, Lotofaga
Aso Faaipoipo: 16 Ianuari 1982.

Soifua Galue i le Ekalesia:

1978-1981: Kolisi Faafaifeau Malua
1982-1984: Kolisi Faafaifeau PTC Fiti
1984-1985: SPATS Library Academy Suva Fiti
1985-1989: Faiaoga Kolisi Faafaifeau Malua
1989-1994: Pule Aoga Kolisi Tuasivi
1994-1999: Faifeau EFKS Lepea, Faleata.
2003-2026: Faifeau EFKS Titirangi, Aukilani.

Tofi i le Ekalesia:

Komiti Tupe & Komiti Au Taumafai, Mtg Aukilani.

Aulotu: **EFKS Titirangi**
Pulega: **Waitakere**
Matagaluega: **AUKILANI**

10. **FAAPAIA SEUMANUTAFANUUMAU FS**
Aso Fanau: 6 Iuni 1956
Faletua: **Faatonusulusamoa Seumanutafa**
Nuu o le Faifeau: Falealupo, Sasina, Vaisala, Auala
Nuu o le Faletua: Fasitootai, Matautu Lefaga, Iva,
Iliili Amerika Samoa.

10. O LE SULU SAMOA ME 2026

Aso Faaipoipo: 21 Tesema 1985

Soifua Galue i le Ekalesia:

1985-1988: A’otauina Kolisi Faafaifeau Malua
1989-1994: Faifeau EFKS Vavau
2000-2026: Faifeau EFKS Penisula o Petesa

Tofi i le Ekalesia:

1988: Peresetene, Mafutaga A’oa’o ma
Faletua, Kolisi Faafaifeau Malua
1992-1994: Komiti Feau Eseese, Mtg Falealili
Sasa’e (Lotofaga Lepa Aleipata).
2019-2022: Komiti A’oga, Matagaluega Aukilani

Aulotu: **EFKS Penisula o Petesa**
Pulega: **Waitakere**
Matagaluega: **AUKILANI**

11. Suafa: **PULETUA TAPUMANAIA FS**
Aso Fanau: 15 Aokuso 1955
Faletua: **Ruta Tapumanaia**
Nuu o le Faifeau: Safotu, Auala, Vaisala.
Nuu o le Faletua: Fa’ala, Saoluafata, Vaitele fou.
Aso Faaipoipo: 18 Ianuari 1996.

Soifua Galue i le Ekalesia:

2002: Faau’u Kolisi Faafaifeau Malua
2003: Faia’oga Kolisi Tuasivi
2004-2009: Faia’oga Kolisi Nuuausala
2010-2012: Sui Pule, Kolisi Vaisigano
2013-2014: Sui Pule, Kolisi Nuuausala
2015: Faiaoga, Kolisi Maluafou
8 Iulai 2016: Faamisionare EFKS Penieli Fou
23 Novema 2016: Osi feagaiga EFKS Penieli Fou

Tofi i le Ekalesia:

2005: Faauu, Faifeau Samoa (FS)
2016 - 2026: Faifeau Tausi Nu (10 tausaga)
EFKS Penieli Fou, Falelauniu.

Aulotu: **EFKS Penieli Fou**
Pulega: **Apia Sisifo**
Matagaluega: **APIA**

12. Suafa: **PETERU FIAUMI TAULA FS**
Aso Fanau: 5 Me 1056
Faletua: **Vaasiva Taula**
Nuu o le Faifeau: Ta’u Manu’a, Oceanside
California, USA.
Nuu o le Faletua: Sapapalii, Saipipi, Sasina,
Toamua, Vaiala.
Aso Faaipoipo: 23 Ianuari 2015

Soifua Galue i le Ekalesia:

2008: Ulufale i le Seminario Kanana Fou
2014: Faai’uina le Taumafai i Kanana Fou
2015: Faaipoipo
2016: Faifeau EFKS Lepale, 28 Aperila.
2018: Faau’u Faifeau Samoa (FS).
2022: 1 Faamalologa
2026: Penisione, 10 tausaga o galulue.

Tofi i le Ekalesia: Faifeau Samoa.

Aulotu: **EFKS Lepale**
Pulega: **Malua Sisifo**
Matagaluega: **MALUA.**

13. Suafa: **AMOS VAETOEIFAGA FS**
Aso Fanau: 28 Aokuso 1955
Faletua: **Punipua Afamiliona Vaetoe**
Nuu Faifeau: Papa Sataua, Nofolii
Nuu Faletua: Lufilufi, Saleaula,
Lefagaoalii, Lefaga.
Aso Faaipoipo: 21 Novema 1981

Soifua Galue i le Ekalesia:

1974-1977: A’otauina Kolisi Faafaifeau Malua
1978-1980: A’oa’oina Kolisi Faafaifeau Fiti
1981-1983: Ofisa A’oa’oga Kerisiano
1984-1992: Faatonu A’oa’oga Kerisino &
Faifeau Aulotu Teine Papauta
1996-2026: Tausinuu EFKS Matautu Falealili

Tofi i le Ekalesia:

1985: Komiti Aoga
1996: Komiti Aoga
2024: Komiti Aoga
Failautusi Pulega Falealili
Failautusi Matagaluega Falealili Safata Siumu

Aulotu: **EFKS Matautu Falealili**
Pulega: **Falealili**
Matagaluega: **FALEALILI SAFATA SIUMU**

14. Suafa: **MALO AFI'A FS**
Aso Fanau: 23 Fepuari 1956
Faletua: **Lisa Afi'a**
Nuu o le Faifeau: Samalaeulu, Faleapuna.
Nuu o le Faletua: Faleapuna
Aso Faaiipoipo: 28 Fepuari 1978

Soifua Galue i le Ekalesia:

1991-1994: A'otauina Kolisi Faafaifeau Malua
1995-2006: Matagaluega A'oa'oga Kerisiano
2006-2026: Tausinuu EFKS Aufaga

Tofi i le Ekalesia:

2006-2026: Komiti Faamisionare Matagaluega

Aulotu: **EFKS Aufaga**
Pulega: **Lepa & Lotofaga**
Matagaluega: **LOTOFAGALEPAALEIPATA**

SAUNIGA PENISIONE & FS

O le sauniga o le Faamamaluina Aloaia o le Au Penisione o lenei tausaga, sa faia i le Aso Lulu 20 Me 2026. Na ta'ita'iina e le afioga i le Taitaifono o le Fono Tele, susuga Enefatu Lesa FT. O talosaga na fofogaina e le afioga Sui Taitaifono Fono Tele, susuga Palemia T Reupena FT. O le Tusi Paia na faitauina e le Failautusi Aoa, susuga Dr. Taipisia Leilua FS. O le tolaulauina o Talaaga o le Au Penisione na nafa ma le Failautusi Komiti Au Toeaina, susuga Amuia Seuala FT. O le tauaoina atu o Ula, Pine, Tusi Faamaonia, ma meaalofa tupe ta'i \$10,000, na feagai ma le Taitai o le Sauniga ma lona faletua. E to'a 14 i latou ua penisione mai le galuega faifeau tausi nuu i lenei tausaga. O le susuga Nove Vailaau FT na saunoa fai ma sui o le au penisione, e faaleo le viiga o le Atua e ala i le faafetai i le ekalesia. O le sauniga o le Faauuga o le tofi Faifeau Samoa, sa faia i le Aso Toonai o le Fono Tele, 16 Me 2026. O le susuga Asotasi Gu Time FT na ta'ita'i, o le Tusi Paia na faitauina e Soa Fuamaila FT, o talosaga na saunia e Iakopo Leleimalefaga FT. O i latou sa faae'elima, o Asotasi Gu Time, Leaso Tupai, Taise Ioapo, Saitumua Tafaoalii, Fili Matalavea, Misipalauni Faatau. E to'a 24 i latou na faau'u i lenei tausaga. Ia manuia tele outou susuga i Faifeau ma Faletua, ua faaau mo le tausiga o le Upu ma Sakarameta.

A'O A'O FAAU'U i le TOFI **FAIFEAU SAMOA 2026**

1. Brian & Liulasi Anae Aana
2. Faafetai & Jeddah Korcia Kolisi F. Malua
3. Falevaai & Eseta Ah Kuoi Faleata
4. Fiaalii & Alovale Mafuolo Faasaleleaga
5. Filipi & Upolu Taa Aana
6. Gaolo & Shirley Elisara Aana
7. Hobert & Pepe Sasa Kolisi F. Malua
8. Ioane & Melizza Vaiao Aana
9. Malaeloa & Faasalu Toleafoa Malua
10. Manase Shalom & Urita Afutiti Faleata
11. Maotua & Olivia Upulasi Falealili Safata Siumu
12. Metusela & Avei Samoa Lotofaga LA.
13. Nepo & Fuifui Anae Niusaelese i Sisifo
14. Petero & Soaimaile Taufagu Amerika
15. Salevao & Semester Leone Niu Sila Saute
16. Samuelu & Mane Afutiti Amerika
17. Sega & Salani Asafo Niusaelese Sisifo
18. Solomona & Josephine T. Masua Apia Sasa'e
19. Sulufaiga M & Georgina Samasoni Apia
20. Tafatolu & Emelia Bentley Kuiniselani i Saute
21. Tafatolu & Aaone Tapaleao Kolisi F. Malua
22. Talolua & Nesa Saia Vitoria
23. Taumaloto & Josephine Salevao Lotofaga LA
24. Vaafuti & Agneta Alauni Laumua o Aotearoa

12. O LE SULU SAMOA ME 2026

O I'A MAI LE UPEGA

"Aumai ia nisi i'a ua outou maua nei"

O IESU mai le ITUAIGA O IUTA

Aisea na tupuga mai ai Iesu Keriso mai le ituaiga o Iuta? Afai e te maitauina le fanau to'a sefulu ma le toalua a Iakopo, e foliga mai ai le tofiga ma le filifiliga a le Atua, i se vaaiga muamua lava, ua lu'itauina, ma fesiligia, ma faaleaogaina ai le faataatiaga masani e faavae ai aiga, faapea tu ma aga a le lalolagi o tagata, aemaise i le siosiomaga o Isaraelu. E tusa ai ma tu ma aganuu faavae a atunuu i aso ua mavae, o le faasologa o le laina ma le toto aloalii, sa tatau ona maua e Reupena, o le ulumatua i la le tino, o le alii o aiga i le aganuu, o le pule ma le suli faaetulafono. Ae a tuu ane foi i le tulaga o le amio paia ma le soifuuga mamā, sa tatau ona filifilia Iosefa, le atalii sa pele ma faapito i ai le alofa o Iakopo, ina ia auala mai ai le Alii o Iesu.

Peitai, ua faapasi ese uma e le Atua, e le gata o le ulumatua o le suli faaetulafono ma faaleaganuu, a ua faapea foi ona faapasi e le Atua, le suli agavaa e fua i le amio lelei. Ui i lea, ua tuu atu e le Atua lea tofiga, lea faamanuiaga, le palealii e faavavau, le tofiga mamalu ma le paia, le laina e ui mai ai le Mesia a o Lona Alo pele e toatasi, ia Iuta, le atalii lona fa o Iakopo; Iuta, le atalii o lona olaga na iloga lona faalataina o lona lava aiga, ma le faatinoga o le faatauina o lona lava uso moni e fai ma pologa, mo le tau i nai tupe siliva itiiti.

Pe aisea o le a faae'atu ai e le Atua le faaolataga o le lalolagi i le uso e pogisa lona tuanai? Atonu o le a faapea ane nisi i le mafauauga masani, e pule lava le Atua i ana tofiga. Peitai, o le tali i lenei fesili taua, o le a mafai ona suia ai lo tatou malamalama i le mataupu o le alofa tunoa. Ina ia manino pe aisea ae pe na faapefea ona filifilia Iuta, ia tatou tuliloa ma maitau le mataupu o loo finauina, a o ai foi isi uso e finauina lo latou agavaa. E manaomia ai lo tatou ulufale atu i se lalolagi, o le mataupu i tofi, e le na o se mataupu faasino i oloa ma tamaoiga, o fanua ma mea totino, ae o se mataupu faalelalolagi aoao tetele. Ua uma ona osi le feagaiga a le Atua ma le tamā ia Aperamo. O lenei feagaiga e le na ose folafolaga masani poo se faamanuia faaleagaga faalēiloga, a o le feagaiga osi aloaia, o folafolaga moni ma e faamaufaailogaina faaetulafono faatasi ma ona aiaiga e maoti ma faapitoa. E auala mai i le fanau totino a Aperamo, o aiga uma o le lalolagi o le a latou tau

fai maua uma faamanuiaga. O le Mesia, lea ua faamoemoe na te faaola le fanau a tagata, na faatatau tonu lava e ui mai o ia mai le alatoto e tasi, e lē motusia, mai ia Aperamo. O augatupulaga taitasi i le tuufaasolo mai sa taumafai e faalautele le faanatinati o le fesili: o fea le laina, o ai le atalii, o ai le aiga?

Na faasolo atu ma pasi atu e Aperamo le feagaiga ia Isaako, le na ia pasi atu foi ia Iakopo, e ui ina sa le'i aunoa foi ma fefinauiga. O Iakopo na ia maua faamanuiaga a lona tamā i auala faatogafiti, na ia faoa mai ai i lona uso matua o Esau. Mulimuli ane ona pa'ū mai lea i lima o Iakopo, faatasi ma le mamafa o lona talaaga faasolopito e lavelave toe ma'ale'ale. E toasefulu ma le toalua atalii o Iakopo, ma e tatau ona faasolo i luma le feagaiga e ala i se tasi o i latou. I atunuu i Sasa'e anamua, o le faiga o lenei tuufaasolo sa lē o se mea faalilolilo poo se misiterio; o le tulafono faalenatura, i aiga ma aganuu, o se tasi o faavae aupito matua ma leva.

O le ulumatua sa le'i gata o le tama tane e muamua fanau mai; sa ia umia le tofi ma nofo i le nofoaga paia. Na te maua tofi e lua mai le tamaoiga o le aiga ma umia le pule faaleagaga mai lona tamā, ma e avea ma faauluuluga faaetulafono o le aiga pe a maliu le tamā. O le aiā tatau faale ulumatua na te faailoa faamanuiaga uma – faaletino, faaletamaoiga, faaleagaga, faaleaganuu, faalefeagaiga; o faamanuiaga aupito sili mo se tagata.

Peitai, i lalo ifo o le fola faaetulafono o le aiga o Iakopo ma lana fanau, sa i ai se mea e sili atu ona ogaoga lona ma'ale'ale sa tupu ai. O Iakopo e to'afa ana avā ma ona atalii e to'a sefulumalelua; ma o le aiga sa laulua ma ta'eta'ei i laina loloto o faafitauli. O Reupena, Simeona, Levi ma Iuta o fanau a Lea, le avā na faatogafiti ona faamalosiā i ai Iakopo – o se fafine sa le'i filifilia i lona loto fuatiaifo, ma o loo manino le faamatalaga o lea mafutaga ma le sootaga, sa aunoa ma le alofa. O Iosefa ma Peniamina o fanau ia a Rasela, le avā lalelei a Iakopo na alu ai le sefulumalefa tausaga o ia auauna ai, le fafine na ia alofa i ai mai le uluai taimi na vaai i ai i le vaieli. O lenei alofa faapito o Iakopo sa le'i natia. Na fai e Iakopo le ofu felanua'i mo Iosefa, a o ofu masani ai mo le isi auuso. Na ia tausi i le fanau a Rasela i se ala faapelepeleina e sili atu i isi, tautala i ai i se leo agaalofo e ese, ma tausi faapitoa mo lo la saogalemua.

O le fanau a Lea sa tuputupu a'e ma latou maitauina lo latou tamā ma lona alofa e faapito atu i le fanau a se isi fafine nai lo latou. Ma o lona manu'a sa loloto lona tiga, na ia faaona malie isi mea na tutupu mulimuli mai.

Sa manino lava le sui filifilia faaletulafono: o le ulumatua o le fanauga, o ia sa umia le tofi e tusa ma le tulafono, e tusa ma le aganuu, ma le tulaga fetau ua masani ai le lalolagi anamua. O lona igoa o Reupena. Na ia umia le taunuuga atoa o le Mesia folafolaina i ona lima. Ma e tataua ona tatou vaai toto'a i ai, pe na faapefea ona tauaveina e Reupena lona faamanuiaga tele. Na malamalama lelei Reupena i le mamafa o le avega i lona tulaga. O ia le ulumatua a Iakopo, le suli e agavaa i vaega e lua o faamanuiaga, ma le pule faaleagaga uma, o le ositaulaga e toatasi i totonu o le aiga. Pe afai e afio mai le Mesia e ala mai se tasi o le fanau a Iakopo, o Reupena le atalii, le ulumatua, le tamatane, le suli ma le sui filifilia.

Sa leai se fesiligia, leai se faatauvaga, leai se isi e apili pe tetee; o lona lava lea tofi. Paga lea, e tasi lana gaioiga faavalea na fai, na faaleaogaina uma ai lea tofi ma ona faamanuiaga. E tasi le fuaiupu o loo faamauina ai le agasala a Reupena, Kenese 35:21: *“ona alu ai lea o Reupena ua momoe ma Pila le palake a lona tamā.”*

Ua ta'u manino mai lenei mea i se fuaiupu faigofie, ma faasolo pea le tala; peitai soo se tagata o atunuu Sasa'e anamua e malamalama lelei i le uiga mata'utia o le mea ua tupu, e lē na o se amioleaga ua fai po o se agasala o le amio lē pulea ua faavalea. I atunuu i sasa'e, o le ave e se atalii o se palake a lona tamā, o se gaioiga faapolokiki e fai fuafua lelei, e faailoa ai le tete'e, le fomalalo, e tutusa ma le ave faamalosi o le palealii o le tupu, o le pule faamalosi i se faigamalo. O le ave e Reupena o le palake a lona tama, o lona faalauiloa faalauaitete lava lea, o le pule tuai faalokopo ua uma, a o ia lea ua ulu ma pule i le aiga i le taimi nei ma a taeao. O lenei gaioiga e le se faatinoga o le vaivai po o le tuinanau; a o le faatinoga o le paoa. O ni senituri mulimuli ane, na faia ai e Apisaloma, lenei lava foi agasala faavalea. Na ia momoe ma palake a Tavita lona tamā, i le taimi o lona foua o le malo, a o silasila Isaraelu uma (2 Samuelu 16: 21-23).

Na iloa e tagata uma o lona augatupulaga le uiga o le mea ua fai e Reupena; ua ia faalauiloa ma folafola

atu lana pule ma lona paoa, a e le'i oo i lona taimi, ae le'i maliu lona tamā, ma e le'i faia i ai se fuafuaga a le Atua.

Na faalogo Iakopo i le mea na tupu, a o lana tali atu i ai o le sālō - leai se upu na o le filemu. Mo le tele o tausaga, na ia tauave ai le manu'a natia i totonu o lona aiga, aunoa ma se faalauiloa poo se a'oa'iga. O lenei sālō filemu e lē o se faamagaloga; a o se faasalaga faaolioli. O Iakopo e le o se tagata e loto galo pe faagalo gofie ni mea; o ia o se tagata e masani ma le faatali ma le onosai. E luasefulu tausaga mulimuli ane, a o taoto Iakopo i lona moega o le a oti, na ia valaau ma faapotopoto ona atalii e sefulu ma le lua, e tautala atu ai ma fai lana mavaega, o le faamanuia ma le faamoemoe mo le tagata i le lumanai. Na amata lava le valaau ia Reupena le ulumatua; ma atonu sa leai se faaletonu o lona mafaufau i le faamanuia a lona tamā, e tusa ai ma lona tulaga faaalii o aiga, i le tofi ulumatua e fa'aauau ai le laina paia. Peitai, na faaleaogaina lona tofi i lona aso, ona o lana mea na fai. E puupuu lava ma faigofie upu a Iakopo na faailoa ai le i'uga o Reupena – *“e le faasili lava oe”* (you will not excel). O le tamatane na ia uu le feagaiga e faavavau i ona lima, ua na tia'i ese lona tofi ona o se po e tasi o le valea polokiki. Na faasolo le tootoo. O atalii lona lua ia Simeona, ma le lona tolu ia Levi, o i la'ua ua oo atu i ai le faasologa. O i la'ua e agavaa e tusa ma le faasologa masani, i e ua tataua ai tofiga.

Ui i lea, o le mea na la'ua faia na afaina ai lo la'ua tofiga, e lē o se vaivaiga na fananau mai ma la'ua, po o se lape na oso faafuase'i a o tuputupu a'e. Peitai, o se agasala i se gaioiga na fuafua faalilolilo, se agasala mata'utia o le fasioti tagata faamoemoeina, na faatino i le laasaga e tulaga ese lona ogaoga (Kenese 34). Sa i ai le afafine o Iakopo, a o le tuafafine o nei tama, le teine o Tina, na alu atu e asiiasi i fafine o le nuu. Na iloa o ia e le tamalii o Sekema, o se tagata sa pule malosi, na mana'o i ai ma i'u ina ia faaleaga ia Tina. E le gata i lea, a ua ia faatonu lona tamā e fai se feiloaiga ma Iakopo, e sauni se la'ua faaipoipoga ma Tina, e pei e leai se mea na tupu. Na faalogo Iakopo i le mea ua tupu ma le tiga, ae le'i i ai sana tala, sa faatali i le foi ane o ona atalii mai le vao.

Na taunuu ane Simeona ma Levi. La te le'i osotū pe osofa'i i lea taimi; ae na faatumulia i le loto ita ma le

(fa'aauau itulau 16)

TALA O E UA FAI I LAGI LE FOLAUGA

REV. IAKINA ALEFAIO FP
21 Iulai 1953 – 01 Iuni 2026

O le susuga ia Iakina Alefaio, o le Faifeau Penisione a la matou Ekalesia EFKS Elise Fou, Pulega Faleata i Sisifo ma le Matagaluega a Faleata. Na soifua mai i le Aso Lua, 21 o Iulai 1953, a e na valaau i ai lona Matai i le Aso Gafua, 1 Iuni 2026. Ua atoa le 72 tausaga, 10 masina, 11 aso le matua o lona soifua. O ona matua, o lona Tamā o Ioane Alefaio a o lona Tinā o Samoa Alefaio. E toa sefulu (10) i latou, ma e lona lima le susuga ia Iakina. Sa faaipoipo atu ia Matagitau Alefaio i le tausaga 1989 (o le alo faasino i le faifeau o Faamoana Tago FS & Mine Auelua sa galulue i le EFKS Foua Salelologa), a e na valaauina e le Matai le faletua ia Matagitau i le tausaga e 2009, ona toe faaipoipo lea ia Rowina i le 2009, e oo mai ina ua faamanava e le Atua feau a lana auauna. E toa lima o la alo, e toatolu tama a e toalua teine. O fanau a lana fanau e to’ a valu.

O lona soifua aoaoina, na amata mai i le Aoga tulaga lua i Vaigaga Primary, faasolo atu i le Kolisi o Faleata, o le Kolisi o St Joseph a e faaii i le Samoana High School i Amerika Samoa. O le tausaga e 1989, na ulufale ai i le Kolisi Faafaifeau i Malua ma faaiiina i le tausaga e 1992. Na valaauina ma osia le feagaiga ma le Ekalesia i Saanapu Tai i le tausaga e 1993, ma galulue ai se ia aulia lona tausaga Penisione i le 2024. O lona uiga e 31 tausaga sa galulue ai i le Ekalesia i Saanapu Tai. Na Penisione mai ma matou galulue i Elise Fou i le aso 28 Iulai 2024 sei oo mai ina foi atu lona Agaga i lona Matai. O lona uiga, o le umi o le matou mafutaga, e 1 le tausaga ma le 11 masina po o le 23 masina. A e moni ai upu a le atunuu “E itiiti a lega mea” auā e ui ina foliga puupuu aso o la matou mafutaga, a e telē ma anoa lona sao taua i le matou galuega.

O lona sauniga faa le aiga, na faia i le maota maliu o Sefo i Tafaiata i le Aso Gafua 15 Iuni i le 2 i le afiafi. Sa ou taitai ma tapena le upu faamafanafana mo le faletua ma le fanau ma aiga, a o le susuga i le Aoa Fesoasoani ia Taefu Salapu, na fofogaina talosaga. Ina ua maea ona molimoli atu lea o lona sa e tofa i lona maota i Aleisa mo leoleoga o le po. O le 10 i le taeao o le Aso Lua 16 Iuni, sa faia ai ona toe sauniga i le Malumalu o le EFKS i Elise Fou lava. Sa valaaulia le Pulega a Faleata i Sisifo, e taitaiina ona toe Sauniga. O le Toeaina o le Pulega ia Iosefa

Afutiti sa taitai i toe sauniga o le Faifeau Penisione, o le Tama Faatonu o le Matagaluega a Faleata o Misipalauni Faatau sa feagai ma le lauga, o le susuga i le Faifeau ia Faalefu Tumutalie na faitauina le Tusi Paia, a o le Faifeau Elise Fou, Reupena Seteuati Nofoaiga, sa saunia tatalo ma faaulufale le sa o le Penisione. O molimau o lona aso, o le faletua ia Rowina, o le Sui o fanau na fofogaina e le afafine, le faletua o Sarahnetta Pupi (faletua o Rev Challis Pupi EFKS Samusu), o sui o aiga na saunia e lona tuafafine, le faletua ia Filifili Solomona, o sui o le tausaga a Iakina i Malua, o le Susuga i le Toeaina ia Uta Muaulu, na molimau foi le Susuga i le Toeaina ia Tuia Peseta, o le sui o le Pulega a Safata ma Siumu lea sa galulue ai Iakina. Sa faaopopo i ai le molimau a le faletua o le Toeaina Penisione ia Sapini Eteuati, o le sa pale feagai ma Iakina i lona soifua talavou, ona faaii lea i le molimau a le Faifeau Elise Fou.

Na faavae la’u molimau i le upu a Paulo i le Ekalesia i Roma 12 e faapea, “*Ia outou tuuina atu o outou tino i le Atua, o le taulaga ola, ma le paia, ma le malie, o le mea lea e tatau ai ona outou faia.*” O molimau a lana fanau i le sauniga faa le aiga, na taua ai ona uiga faa tamā alofa, e a’oa’i lana fanau i le sasa. E le o se tagata e tele ni upu, e fiafia e tautua lona aiga, e pele ona tuafafine, e faamuamua le galuega a le Atua i ana galuega e fai. E le o se tagata foi e faigofie ona suia e se tasi ona manatu ma le mea ua tonu i lona mafaufau, e finau malo, e le fefe e fai le galuega, e tautala sa’o, e tele taleni sa ia te ia. E ta piano e le manao i se faaletonu, e saua i nisi taimi. Na molimau foi tama fanau a le nuu ua o i le galuega, o lana sasa ua lelei ai o latou olaga. O le molimau foi lea a lona aiga e pei ona taua e lana fanau. O la’u lea molimau i le Faifeau Penisione, le susuga ia Iakina Alefaio, sa fai ma paolo ou te malu ai, o lona tauau sa ou faalagolago i ai, o lona siufofoga sa sūsū ai ou ivi ma maua ai le lototele i le galuega, auā o lana faamalosi lea mo le faifeau faatoa galue, aua le palaa e fai le finagalo o le Atua, ia toa le loto, a e iloa e sese fai i tagata e sese. O lau faafetai lea i le Atua, ona o lana auauna Penisione, sa saili ma faamoemoe i ai i lona finagalo e taitai le galuega. O se auauna e tausi faifeau, e tumu i le fa’aaloalo ma amanaiaina o ma tagata, e ui e le auga le faatauva ma le soifua o le Penisione, a e sa lagona pea le mafanafana o lana tofa faa tamā alofa. E viia pea le suafa mamalu o le Atua ona o lana auauna ia Iakina

ATA O E UA MALILIU & TALA TUSIA



Alefaio, o le Faifeau Penisione. O ona toe sauniga na faia lava i lona fanua ma lona aiga i Aleisa, o a'u na lafoaiina lona tino i lona tuuga e mau ai, ma matou faatofa i lana malaga le toe foi mai, i le pese faatofa a le au kerisiano, "Talofa uso e, tofaina oe" Ia manuia lau malaga lau susuga i le **Faifeau Penisione IAKINAALEFAIO**, ia faamanuina pea le suafa o le Atua, ona o lou soifua tautua i lana talalelei. Alu ia ma le manuia.

Saunia Reupena Seteuati Nofaiga FS
EFKS Elise Fou
Matagaluega FALEATA

O I'A MAILE UPEGA

(mai le itulau 14)

tiga oona, sa taofiofi mamau a o fai le fuafuaga e tau i atu ai. O le fuafuaga na fai ma faailoa ia Sekema e lona tama, e lē mafai ona la'ua tuu atu lo la tuafafine i se tama tane e le'i peritomeina, ona o se luma tele lea mo i latou. Ma faia ai le faai'uga: afai e peritomeina tama tane uma o le nuu o Sekema, o le a mafai ona tuufaatasia aiga, faaipoipo ma feusua'i, ma avea i latou ma nuu e tasi. Na malie i ai Sekema ma faatonu tama tane uma o lona nuu ina ia peritomeina tagata uma. Ua oo i le aso tolu talu ona peritomeina Sekema, a o i ai tane uma i taimi aupito tiga o le taotoga, na savavali atu ai Simeona ma Levi i faitotoa o le aai o Sekema ma pelu i o lima. Na la'ua fasiotia ai tama tane uma, ma ave uma le vete o le aai, o fafine ma tamaiti, o lafua manu ma oloa, o mea uma sa i le aai o Sekema. O le ala lea o le faaleaogaina o i la'ua mo le tofi paia tuufaasolo, ona e le gata o le mata'utia o le metotia na faatino ai le tau i ma sui, a

o le fa'aaogaina o se tasi o faailoga faitino e paia faafeagaiga. Na la'ua fa'aauppegaina le peritome, o le faailoga paia e vaaia i le tino o tama tane, e faamau ai le feagaiga osi a Aperaamo ma le Atua. Ua la'ua faaliliu le mea aupito paia ma mamalu, e avea ma se mailei, e fasiotia ai le faitau fia o tagata.

E le na o se sauaga mata'utia lenei mea, a o le faifai ma upuvale i le Atua. O le tali atu a Iakopo ia te i la'ua sa vave lava ma ogaoga: "*Ua oulua faatiga mai ia te au, e inosia ai a'u e i latou o e mau i le nuu, o sa Kananā ma sa Perisē.*" O lana faamasinoga ma le faai'uga taumavae a o taulia i le falaefu, "*Ia fetuuina lo la ita ina ua silisili, ma lo la ita tele lava ina ua la finau vale ai; ou te vavaeina i laua i le nuu o Iakopo, ou te faata'ape'apeina i laua i Isaraelu.*" O le iuga lena o le auuso, o atalii lona lua ma le tolu. Leai ni sauniga fiasia, leai se apili, na o faamaumauga tumau o mea na la'ua filifili e fai i le tofi na faae'e atu ia i la'ua.

Ma ua laa atu ai nei le faasologa o le tofi i le atalii lona fa, ma o iinei e atili ai ona loloto le tulaga lē manofolelei o le tala. O Iuta sa lē o se tagata e sili atu sona lelei nai lo ona uso matutua, ma o le a ia faamaonia lea i ni auala o le a tuliloa ma taumulimuli ia te ia i aso o totoe o lona ola. O tala i vaivaiga toilalo o Iuta sa le'i taunuu mai i se lape faafuase'i e tasi po o se aso e tasi; a o le faaputuputuga faasolosolo o mea eseese i le faasologa o tausaga, ma valivali ai se ata o se tagata sa filifili pea lava pea e savali i le auala sesē. E tatau ona tatou vaavaai i ai, auā a aunoa ma lo tatou malamalama i le maulalo o le pa'ū ifo o Iuta, tatou te lē mafai ona tatou u'umauina le silisili ma le matagofie o mea e tele na oo ia te ia mulimuli ane.

O lona toilalo muamua lava e faamanatu mai e le tala faasolopito lauiloa. O lona uso o Iosefa a o sefulu ma le fitu ona tausaga, na latou lafo ia te ia i le lua ma le faamoemoe e fasiotia ai o ia. Na vaai Iuta i le fefe o le uso laititi ona fai ane lea, "*Se a le aogā pe a tatou fasioti lo tatou uso, ma ufiufi lona toto? O mai ia, ina tatou faatauina ia i sa Isamaeli.*" *Kenese 37:26.* Mo le luasefulu tupe siliva, na ia faaliu oloa ai lona lava ivi, toto ma aano; ua na avea ai le tagata ola, o se mea totino mo fefaatauaiga....

E sosoo atu i le Sulu Samoa Iuni 2026